

Канон святаго пророка Божия Илии, глас 2.

Песнь 1

Ирмос: *Поим Господеви, в мори древле люди наставльшему и в нем фараона со всевоинством погрузившему, песнь победную, яко прославися.*

Видети желающии Илии чудес огнедохновенную силу, огнезрачного и честнаго языка, духа крепость, по достоянию собрахомся.

Устне, Богоносе, и недоуменнаго языка тесноту же и худогласие, действом, еже в тебе, Духа отверзи и уясни к пению чудес твоих.

Даеши паче естества повинувшимся, Слове, честным Твоим повелением и покоряеши дождю двери духом, утверждаемо слово содевая.

Богородичен: *Поем Господеви, от Девы рожденному, и мир обновльшему, и Тоя ради нам жизнь Божественную даровавшему, песнь победную, яко прославися.*

Песнь 3

Ирмос: *На камени мя веры утвердив, разширил еси уста моя на враги моя, возвесели бо ся дух мой, внегда пети: несть свят, якоже Бог наш, и несть праведен, паче Тебе, Господи.*

Яко изряден, пророче, Учреждитель, Иже враном творя тебе гощение, единый, насыщаяй всяко животно благоволения. Ему же вси зовем: Ты еси Бог наш, и несть свята, паче Тебе, Господи.

Благодать Благодетелю и Строителю, вдовицу и пророка напитавшему неизреченным промышлением. Ему же вси зовем: Ты еси Бог наш, и несть свята, паче Тебе, Господи.

Затворивый тученосныя облаки одаждити, пищи лишаеме Сареффе, останок брашна непрестанно росити сотвори. Ты же взвывал еси: несть свята, паче Тебе, Господи.

Богородичен: *Ты едина паче всех от века великим сподобилася еси и паче естества: Бога бо, Невместимаго всею тварию, во чреве прияла еси и воплотила еси. Темже Богородицу Тя вси почтаем.*

Седален, глас 8

Источника чудес, пророков удобрение вси песненно, вернии, восхвалим, Фесвитянина Илию: с плотию бо еще сый безсмертен, яко мертв уверяет мертвых востание. Темже дерзновение к Богу имея, подавает исцеления верою просящим и молится Христу

прилежно согрешений оставление подати празднующим любовию святую память его.

Песнь 4

Ирмос: **У**слыхах, Господи, слух Твоего смотрения и прославих Тя, едине Человеколюбче.

Кореносекатель убо явился еси злобы, мудре пророче, добродетели же насадитель, темже тя ублажаем.

Укоряше тя словесы вдовица, пищею смерти, пророче, отрока востание уверяющи.

Назнаменова славу Троицкую яве дуновением тричисленным, матери детища жива дарова.

Коль разжеглся еси, паля Божественным огнем и ревностию, о пророче, царя обличая, творяща беззакония.

Богородичен: **М**олим Тя, Чистая, Бога без семене заченшую, присно молитися за рабы Твоя.

Песнь 5

Ирмос: **С**вета Подателю и веков Творче, Господи, во свете Твоих повелений настави нас: разве бо Тебе, иного бога не знаем.

Закон отеческий тя яко молитвенника всеистинна показа, чудодейственника, обращающа естества стихии, Илие, и преподобну жертву попаляюща водами.

Посрамил еси изрядно, яко истины служителю, преподобне, сквернаго студа пророки, всеблаженне Илие, яве начертав Троицкую силу.

Словом благодати священствуя, Илие, заклал еси священники студныя неповинными твоими руками, якоже огнем, ревностию опаляемь.

Богородичен: **Т**ебе, рождшей Христа, всему Содетеля, взвываем: радуйся, Чистая, радуйся, Свет возсиявшая нам, радуйся, вместившая Бога Невместимаго.

Песнь 6

Ирмос: **Б**ездна согрешений обыде мя последняя, но, яко пророка Иону, Господи, Господи, возведи из истления живот мой.

Столп благочестия и жития чистаго, садитель чистоты был еси, Ангелом же подобник, чудный Илие Богоносе.

Гнев тя пророкоубийцы жены устрашив, вязати и решити приемша дождев течение, чудный Илие, бегати творит.

Возвысил еси, колена преклонив, ума превознесенное око, мольбою изрядною решение творя, и бразды земныя упоил еси тучами.

Богородичен: Купина Тя в Сиаи, неопально приближився огню, преднаписует Матерь Приснодеву, Всепетая Богородице Марие.

Кондак, глас 2

Пророче и провидче великих дел Бога нашего, Илие великоимените, вещанием твоим уставивый водоточные облаки, моли о нас единаго Человеколюбца.

Икос

Многое человеков беззаконие, Божие же многое человеколюбие зря, пророк смущащеся Илия, ярся, и словеса немилостивна к Милостивному подвиже, прогневайся, возопив, на отмещущияся Тебе, Судие праведный! Но утробу Благого никакоже подвиже, еже мучити Того отметающаяся: присно бо покаяния всех ждет единый Человеколюбец.

Песнь 7

Ирмос: Купина в горе огнеопальная и росоносная пещь халдейская яве предписа Тя, Богоневесто: Божественный бо Невещественный в вещественном чреве Огнь неопально приняла еси. Тем из Тебе Рождшемуся поем: благословен еси, Боже отец наших.

Преславно Божественною ты воображеною силою облекся, пищею четыредесятодневною, Илие чудный, долгий шествовал еси путь. Темже в Хориве глаголал еси: благословен Бог отец наших.

Хлад кроток показа и тонок Господа тебе, Илие, по Бозе ревнующу Вседержители, не дух бурен, ни трус, ни огнь страшай. Темже Иисусу кроткому пел еси: благословен еси, Боже отец наших.

Богоявления сподобился еси и пророчества, якоже великий Моисей, пророки помазуя Духом и цари, Илие чудный. И, славы на Фаворе Христовы зритель быв, пел еси: благословен еси, Боже отец наших.

Богородичен: Рождаеши без семене Безначального и Превечного Господа, Отча Сына, мудрость же и силу, напоследок, Пречистая, паче естества плотию, на обновление земных. Темже из Тебе рождшемуся зовем: благословен Бог отец наших.

Песнь 8

Ирмос: Устранийся отроков благочестивых сообразного души несквернаго тела и устранися воспитанный в безмерном веществе неутружен огнь, присноживущу же, изувядшу пламеню, вечнующая песнь воспевающе: Господа, вся дела, пойте и превозносите во вся веки.

Изрядно обрете Ахав рода отражение всегубительное, пророка обличением, сквернаго убийства мерзкое мучение: Фесвитянин же от огнедохновенна ума Жизнодателю песнь воспеваще: Господа, вся дела, пойте и превозносите во вся веки.

Дождит тебе огнь с небесе, попаляя, Илие, одержимых пятьдесят сугубо, яко Божию изрядну служителю: Держащему бо присноживотную жизнь боголепно песнь взывал еси: Господа, вся дела, пойте и превозносите во вся веки.

Тайнника тя показа Христос, яко чистоты садителя и девства Пребожественное прозябение на Фаворе Божественного воплощения, Божества непостижимый свет во Своей плоти показав тебе, зовущу: Господа, вся дела, пойте и превозносите во вся веки.

Богородичен: Всебогатна бысть утроба Божия Матере, яко приемши Слово дебельством плоти, от Нея смешена земнаго зрака по ипостаси явися град Божий, в немже Вышний жити благоволи. Ему же поем: Господа, вся дела, пойте и превозносите во вся веки.

Песнь 9

Ирмос: Яже прежде солнца светильника Бога возсиявшаго, плотски к нам пришедшаго из боку Девичу, неизреченно воплотившая, Благословенная, Всечистая, Тя, Богородице, величаем.

Нетренное люди шествие на земли пожив, милотиу струю Иорданскую Фесвитянин прешед, оружник воздушный, неботечное соверши странное шествие Духом.

Благочестия ревностию Фесвитянин опаляемъ, на огнезрачней колеснице взимается, милотъ же сверже, еюже, утаитися не возможе Елиссея, одеявся, приемлет Божественную благодать.

Откровение Боговидец Фесвитянин с Моисеем зрит, яже око не виде, и ухо не слыша, и на сердце человек земнородных не взыде, воплощенна Господа, на Фаворе Вседержителя.

Богородичен: Напраснаго древняго отъятельнику осуждения и праматере исправление, Юже рода к Богу вину присвоение, к Зиждителю мост, Тя, Богородице, величаем.

Светилен

Свет, на огненней четвероконней колеснице небошественна тя показавый оружника, Илие, не пожре вконец: огнь бо языком огненным привлекл еси низу и изсушил еси тучи.